

Patres omnibus in sermonibus & colloctionibus antea egissent, atque inter ipsos Herculemque convenisset, potestatem ei faceret de Pisano bello, quemadmodum sibi videretur, ita statuendi: potestate ab utrisque tradita, Hercules cum legatione, quam ad illum Florentini miserant, cumque Ludovici legato ad urbem venit. In urbe cum esset, tres ei cives Principis collegium attribuit, qui ei præsto essent, si quid petere aut cognoscere vellet, atque ad Principem & Patres renunciarent. Scripto autem, nequedum prolato iudicio, cum se id Hercules Patribus ostensurum esse diceret, ut si quid aboleri aut commutari vellent, liceret: Georgius Cornelius unus ex Principis collegio Patres est hortatus, afferri ad se libellos juberent, atque inspicerent, ne ignaris ipsis, quid Hercules iudicaturus esset, sententia proferretur. Sed is reprehensus a Patribus, qui dicerent, non esse æquum data Herculi per Senatum potestate suo arbitrio iudicandi, nunc ei leges velle imponere, si quæ scripserit, sint improbaturo: si non sint, frustra inspicere quæ non improbantur; conticuit. Hercules octavo iduum aprilium sententiam tulit; ut remissis atque abolitis, quæcunque in Florentinos quoquo modo Pisani detrimenta eo bello intulissent, Pisæ restituerentur: ut reipublicæ auri libras mille octingentas Florentini darent annis duodecim expensi nomine: multis capitibus ad speciem Pisanae rei meliorem in statum atque formam redigendæ, quam antea fuisset, summæ iudicii additis: re autem, quibus ad pristinam servitutis conditionem temporis momento Pisæ reciderent. Biduo post Hercules salutatis Patribus, quorum nemo fuit qui eum non invitatus & non mæsto vultu viderit, vel etiam qui non de eo magnopere sit questus, quod fidem, quam reipublicæ dederat, tantis præsertim de rebus, non præstitisset, mediam per urbem verbis contumacibus & sibilis a populo explosus domum rediit. Senatus Ferdinandum Herculis filium, & Bentivolos patrem & filium, & Baliones, & Marcum Martinengium, quo exercitus præfecto Pisis usus fuerat, qui se omnes

neque

*Pisæ Florentinis restituantur.*